



Angajoqqaat meeraasa amerlassusaat naapertorlugu akileraartarnikkut ilanngaateqalerunik inuiaqatigiinni amerliartuaarnissamut iluaqutaasinnaanersoq pillugu apeqquteqaat aallaavigalugu oqallisissiasatut siunnersuut.

(Inatsisartunut ilaasortaq Aqqalu C. Jerimiassen, Atassut)

Qujanaq Inatsisartunut ilaasortaq Aqqalu C. Jerimiassen oqallisissiaq una saqqummiukkakku.

Demokraatit isumaqatigisorujussuaat, imaannaanngitsumik unamminartuusoq, meeqqat inunngortartut ikiliartornerat, aammalu inuusuttorpassuit ilaqutariippassuillu nunatsinniit nuussallutik toqqaasarnerat. Politikikkut ukkatarisassaq pingaarutilik, siunissatsinnut, suliffeqarnitsinnut, atugarissaarnissatsinnut nunattalu ineriartortinnissaanut periarfissatsinnut tunngassuteqarmat.

Najugaqarnissamut, suliffeqarnissamut aammalu ilaqutsiornissamut pilerinarninngortittariaqarparput. Ilaqutariit meerartallit toqqissisimasumik sinaakkuteqassapput, ulluunerani paaqqinnittarfissaqarlutik, pitsaasunik illoqarlutik aammalu ulluinnaqarlutik, ilaqutariittut inuuneq aammalu suliffeqarluni inuuneq ataqatigiittut.

Taamatut oqareerlutik, Demokraatit qularaat, meeqqamut ataatsimut akileraarutitigut appaasarnissaq aqqutissaasoq eqqortoq. Tunngaviusumik isumaqarpugut, akileraartarneq akunnaatsuussasoq, ersarissoq sapinngisamillu paasiuminaanngitsoq. Akileraartarneq assigiinngitsutigut politikikkut oqilisaatit atulissagaluarutsigu, paasiuminaanninngorteriiannaallugulu naapertuilluanninnginnerulerseriaannaavarput.

Demokraatit akileraarutip apparneqarnissaa orniginartinneruaat. Sulisunut, akisussaassusermik tiguisunut imminut ilaquuttaminillu pilersuisunut iluaqutaassammat. Suliffeqarfinni akuunissamut pilerinarnerulersitsissaaq aamma inuiaqatigiinnullu tapeeqataanermik.

Maluginiarparputtaaq Naalakkersuisut naliliinerat, angajoqqaanut akileraarutip appartinnera imminermini meeqqiornerulernermik kinguneqarnaviannngitsoq. Meeqqiornissamik aalajangernermi pingaartinneqarnerusarmat ineqarneq, ulluunerani paaqqinnittarfiit, ilinniartitaaneq, aningaasaqarnikkut toqqissisimaneq aammalu ulluinnarni inuuniarnermi periarfissat. Tassunga ilutigalugu aaqqissuussaq annertuunik attanneqartussanillu pisortat isertitaanut kingunerlussinnaavoq, naggataatigut allatigut aningaasalersorneqartariaqartoq.

Toraagaqarnerusumik ilaqutariit meeerartallit aningaasaqarnerata nukittorsarnissaa kissaatigutsigu, tulluunneruvoq meeqqanut tapiissutit imaluunniit allat toqqaannarnerusumik aaqqissuussat isiginarutsigit. Taamaaliornermi ersarinneerullunilu ilaqutariinnut pisariaqartitsinerusunut, pitsaanerussaqqooqisoq.



Taamaattumik Demokraatit pitsaasumik oqallinnissaq qilanaaraat, qanoq ililluta pitsaanerpaamik ilaqtariinnut meerartalinnut toqqissisimasumik sinaakkusiisinnaanersugut, ilaqtariinnut inuusuttunut periarfissanik arlaqarnerusunik aammalu maani nunatsinni innuttaasut amerlisarnissaannut.